

J. C. nimia confluyente ad eum turbâ navem ascendit, è qua populum edocet.

I. C. à Capharnaï in desertum abiit, ut oraret.

XXXIII. Factum est autem cum turbæ irruerent in eum, ut audirent Verbum Dei. Et ipse stabat secus stagnum Genesareth, & videns duas naves stantes secus stagnum (piscatores descenderant, & lavabant retia.) Ascendens in unam navem quæ erat Simonis. Sedens docebat de navicula turbas. Luc. 5. v. 1. 3.

J. C. jubet navem in altum duci, & ad ejus nutum, laxato rete miraculosa fit piscium captura.

XXXIV. Ut cessavit loqui (Iesus) dixit ad Simonem: duc in altum, & laxate retia vestra in capturam. Et respondens Simon, dixit illi: Præceptor, per totam noctem laborantes nihil cepimus, in verbo autem tuo laxabo rete. Et cum hoc fecissent, concluderunt piscium multitudinem copiosam, & rumpebatur rete eorum: & annuerunt sociis, qui erant in alia navi, ut venirent, & adjuvarent eos: & venerunt, & impleverunt ambas naviculas, ita ut penè mergerentur. Quod cum videret Simon Petrus procidit ad genua Iesu: Stupor enim circumdederat eum, & omnes qui cum illo erant. Similiter Iacobum, & Ioannem filios Zebedæi, qui erant focii Simonis, & ait ad Simonem Iesus: Noli timere, ex hoc jam homines eris capiens, & subductis ad terram navibus, relictis omnibus, secuti sunt Iesum. Luc. 5. v. 3. 11.

I. C. redit in Capharnaïm, in qua Spiritum immundum ab homine ejicit.

XXXV. Descendit Iesus in Capharnaïm, & Sabbatis ingressus in Synagogam docebat eos. Erat in Synagoga eorum homo in Spiritu immundo, & exclamavit, Quid nobis, & tibi Iesu Nazarene, venisti perdere nos? Scio quis sis, Sanctus Dei: & comminatus est ei Iesus, dicens, obmutescere, & exi de homine: & exiit ab illo, nihilque illum nocuit. Marc. 1. v. 21. 25. Luc. 4. v. 31. 36.

I. C. egressus è Synagoga domum Simonis ingreditur (in Bethsaida) & ejus socrum à febre liberat.

XXXVI. Surgens Iesus è Synagoga intravit in domum Simonis, & Andreæ, cum Iacobo & Ioanne. Socrus autem Simonis jacebat, & tenebatur magnis febribus: & rogaverunt Iesum pro ea: & accedens elevavit eam, apprehensa manu ejus. Et continuo dimisit eam febris, & ministrabat eis. Matth. 8. v. 14. 15. Marc. 1. v. 29. 30. 31. Luc. 4. v. 38. 39.

I. C. è Bethsaida redit Capharnaïm, ubi vespere plurimos ægrotos sanat.

XXXVII. Vespere facto, obtulerunt ei multos dæmonia habentes, & ejiciebat spiritus verbo, & omnes malè habentes curabat: & erat omnis civitas congregata ad januam, at ille singulis manus imponens, curabat eos. Matth. 8. v. 16. Marc. 1. v. 32. Luc. 4. v. 40.

Et diluculo valde surgens, egressus abiit in desertum locum, ibique orabat. Et persecutus est eum Simon, & qui cum illo erant, & cum invenissent eum, dixerunt ei, quia omnes quærunt te. Luc. 4. v. 35. 37.

I. C. è deserto in circumvicinos locos peregrinatur.

Et ait illis: Eamus in proximos vicos, & civitates, ut & ibi prædicemus: ad hoc enim veni. Et erat prædicans in Synagogis eorum, & in omni Galilæa, & dæmonia ejiciens. Marc. 1. vers. 38. 39. Luc. 4. vers. 43. 44.

I. C. transfretans stagnum obdormiit, & tempestate orta, & à somno excitatus, eam sedat.

Factum est in una dierum: & ipse ascendit in naviculam, & discipuli ejus, & ait ad illos. Transfretemus trans stagnum, & ascenderunt. Navigantibus illis ecce motus magnus factus est in mari, ita ut navicula operiretur fluctibus. Erat ipse in puppi super cervical dormiens. Accesserunt ad eum discipuli ejus, & suscitaverunt, dicentes: Domine, salva nos, perimus: & exurgens comminatus est Vento, & dixit Mari. Tace, obmutescere. Et cessavit ventus, & facta est tranquillitas magna. Matth. 8. vers. 23. 27. Marc. 4. vers. 36. 40. Luc. 8. vers. 22. 25.

I. C. transit in regionem Gerasenorum, ubi dæmones à duobus hominibus ejiciens, eos in vicinos porcos ire permittit.

Et cum venisset trans fretum in regionem Gerasenorum, occurrerunt ei de navi ad terram egredienti duo habentes dæmonia de monumentis exeuntes, sævi nimis, ita ut nemo posset transire per viam illam (unicum dæmoniacum habent Marc. & Luc.) qui videns Iesum à longè cucurrit, & adoravit eum, & clamans voce magna, dixit: Quid mihi, & tibi Iesu Fili Dei altissimi? interrogavit illum Iesus, dicens: Quod tibi nomen est? at ille dixit, Legio, quia multi sumus: & deprecabatur ne se expelleret extra regionem, & ne imperaret illis, ut in abyssum irent: erat autem non longè ab illis, & circa montem grex multorum porcorum pascens, & dæmones rogabant Iesum, ut permitteret eis in porcos ingredi. Et ecce magno impetu totus grex præcipitatus est in mare, & tota civitas Gerasenorum exiit obviam Iesu, rogavitque, ut discederet à finibus suis. Cumque ascenderet navem, capit illum deprecari vir, qui à dæmonio vexatus fuerat, ut esset cum illo (Iesu.) Sed ait illi (Iesus) redi in domum tuam, & annuntia quanta tibi fecerit Dominus: & abiit per universam civitatem prædicans, quanta sibi fecisset Iesus. Ex Matth. 8. vers. 28. 34. Marc. 5. vers. 1. 20. Luc. 8. vers. 26. 39.